

Službeni glasnik BiH, broj 54/10

Na osnovu člana 4. i člana 12. stav (1) tačka 12) Zakona o ministarstvima i drugim organima uprave Bosne i Hercegovine ("Službeni glasnik BiH", broj 5/03, 42/03, 26/04, 42/04, 45/06, 88/07, 35/09, 59/09 i 103/09), člana 16. Zakona o upravi ("Službeni glasnik BiH", broj 32/02, 102/09), člana 120., člana 137. stav (3) i člana 161. stav (1) Zakona o kretanju i boravku stranaca i azilu ("Službeni glasnik BiH", broj 36/08), Ministarstvo za ljudska prava i izbjeglice Bosne i Hercegovine, u saradnji sa Ministarstvom civilnih poslova Bosne i Hercegovine i Ministarstvom sigurnosti Bosne i Hercegovine, donosi

PRAVILNIK

O OSOBNOM STANJU I UPISU U MATIČNE KNJIGE ČINJENICA ROĐENJA, VJENČANJA I SMRTI OSOBA KOJIMA JE PRIZNATA MEĐUNARODNA ZAŠTITA U BOSNI I HERCEGOVINI

I. OPĆA PRAVILA

Član 1. (Predmet Pravilnika)

Ovim Pravilnikom se propisuju osnovna načela, način i posebni uslovi kojima se nadležni organi rukovode u postupku prilikom upisa činjenjica koje proizilaze iz osobnog stanja (rođenje, vjenčanje, smrt) osoba pod međunarodnom zaštitom u Bosni i Hercegovini (u daljnjem tekstu: BiH), uslovi i način na koji se pruža administrativna pomoć ovim osobama u BiH, te priznavanje osobnog stanja stečenog u zemlji porijekla ili uobičajenog boravaka.

Član 2. (Osobe koje ostvaruju pravo)

(1) Osobe koje ostvaruju prava propisana ovim Pravilnikom, pod uslovima predviđenim domaćim zakonodavstvom i međunarodnim instrumentima koji se primjenjuju u BiH u ovoj oblasti, su: a) Osobe kojima je priznat izbjeglički status pravosnažnom odlukom Ministarstva sigurnosti BiH na osnovu člana 116. tačka a) Zakona, b) Osobe kojima je priznat status supsidijarne zaštite pravosnažnom odlukom Ministarstva sigurnosti BiH u skladu sa članom 116. tačka b) Zakona, c) Osobe kojima je priznat izbjeglički status u skladu sa članom 156. Zakona. (2) U slučaju spajanja porodice na osnovu člana 120. stav (3) Zakona, članovi porodice osoba iz stava (1) tačka a) i c) ovog člana uživaju ista prava kao i osobe iz člana 116. tačka a) Zakona, u pogledu ostvarivanja prava propisana ovim Pravilnikom.

II. POSTUPAK I NADLEŽNI ORGANI

Član 3.
(Primjena propisa i obavještanje o izvršenom upisu)

(1) U skladu sa članom 120. Zakona, članom 12. Konvencije o statusu izbjegle osobe iz 1951. godine i njenim Protokolom iz 1967. godine činjenice rođenja, vjenčanja ili smrti za osobe iz člana 2. ovog Pravilnika se upisuju u matične knjige pod jednakim uslovima kao i za BiH državljane, u skladu sa pozitivnim propisima o matičnim knjigama u entitetima, Brčko Distriktu BiH, međunarodnim instrumentima koji se primjenjuju u BiH u ovoj oblasti i ovim Pravilnikom.(2) Sve novoupisane činjenice o osobnom stanju osoba iz člana 2. ovog Pravilnika se dostavljaju Ministarstvu sigurnosti BiH i Ministarstvu za ljudska prava i izbjeglice BiH (u daljnjem tekstu: Ministarstvo).

Član 4.
(Identifikacijski dokumenti)

(1) Osobe iz člana 2. stav (1) tačka a) i c) ovog Pravilnika dokazuju svoj identitet i status važećim izbjegličkim kartonom.(2) Osobe kojima je priznat status supsidijarne zaštite dokazuju svoj identitet i status kartonom supsidijarne zaštite.

Član 5.
(Pribavljanje dokumentacije i administrativna pomoć)

(1) Osobe iz člana 2. ovog Pravilnika dužne su priložiti dokumentaciju potrebnu za upis u matične knjige pod istim uslovima kao i državljani BiH, ako tu dokumentaciju posjeduju ili je mogu neometano pribaviti iz zemlje porijekla ili zemlje uobičajenog boravka.(2) U slučaju da osoba iz člana 2. ovog Pravilnika, prilikom ostvarivanja prava, treba dostaviti dokumentaciju od vlasti zemlje porijekla ili zemlje uobičajenog boravka, a zbog ranijeg progona ne može ili se ne želi obratiti za pomoć ili joj ta pomoć ne bi bila ukazana, Ministarstvo izdaje osobama pod međunarodnom zaštitom uvjerenje o činjenicama iz službene evidencije koje služi kao zamjena za tražena dokumenta.

Član 6.
(Dokazivanje činjenica i pravna pomoć)

U slučaju da se sporna činjenica ne može utvrditi niti na način propisan članom 5. ovog Pravilnika, organ nadležan za vođenje matičnih knjiga je dužan poučiti stranku o tome u kojem postupku i pred kojim organom može takvu činjenicu utvrditi, u skladu sa pozitivnim propisima u BiH.

Član 7.
(Stečena prava)

(1) Prava koja je osoba iz člana 2. ovog Pravilnika stekla prije dolaska na područje BiH i koja proističu iz njenog osobnog stanja priznaju se u skladu sa pozitivnim propisima u BiH.(2) Osobno stanje osobe iz člana 2. ovog Pravilnika, koje je nastalo prije dolaska na teritorij BiH, a za koje ta osoba nema važećih dokaza, utvrđuje se u postupku, na način i pod uslovima koji su propisani pozitivnim zakonodavstvom u BiH.

Član 8.
(Zaštita podataka)

(1) Na podatke koji se odnose na osobe iz člana 2. ovog Pravilnika primjenjuju se propisi o zaštiti osobnih podataka koji se odnose i na državljane BiH.(2) U odnosu na zemlju porijekla osobe iz člana 2. ovog Pravilnika sve informacije i podaci se smatraju povjerljivim i mogu biti dostavljeni zemlji porijekla samo nakon što se prethodno pribavi mišljenje Ministarstva i pismena saglasnost osobe na koju se taj podatak odnosi.

Član 9.
(Načelo najboljeg interesa djeteta i jedinstvo porodice)

(1) Ministarstvo i ostala nadležna tijela u BiH osiguravaju da se u svim radnjama koje se tiču djeteta, prvenstveno vodi računa o najboljem interesu djeteta, te da su sva prava djeteta zaštićena u skladu sa pozitivnim propisima BiH i međunarodnim instrumentima.(2) Dijete se prijavljuje u skladu sa pozitivnim propisima u BiH i od rođenja ima pravo na ime i ostale podatke koji se mogu utvrditi po njegovom rođenju, a koji su bitni za identificiranje djeteta i ostvarivanje njegovih drugih prava.(3) Ministarstvo i ostali nadležni organi u BiH dužni su osigurati poštivanje načela jedinstva porodice, u svim situacijama koje uključuju osobe iz člana 2. ovog Pravilnika.

III. PRIJELAZNE I ZAVRŠNE ODREDBE

Član 10.
(Tumačenje Pravilnika)

Za tumačenje i provođenje odredbi ovog Pravilnika nadležno je Ministarstvo.

Član 11.
(Stupanje na snagu)

(1) Ovaj Pravilnik stupa na snagu osmog (8) dana od dana objavljivanja u "Službenom glasniku BiH".(2) Stupanjem na snagu ovog Pravilnika prestaje da važi Pravilnik o osobnom stanju i upisu činjenica rođenja, vjenčanja i smrti izbjegle osobe i osoba pod međunarodnom zaštitom u Bosni i Hercegovini u matične knjige ("Službeni glasnik BiH", broj 51/07).

Broj 01-41-3593/10 28. maja 2010. godine Sarajevo

Ministar Dr. **Safet Halilović**, s. r.